

NEIDHART: SOMMERLIED 3

I      Ûf dem berge und in dem tal

hebt sich aber der vogele schal;

hiure als ê

gruonet klê.

rûme ez, winter, dû tuost wê!

II     Die boume, die dâ stuonden grîs,

die habent alle ir niuwez rîs

vogele vol:

daz tuot wol.

dâ von nimt der meie den zol.

III    Ein altiu mit dem tôde vaht

beide tac und ouch die naht.

diu spranc sider

als ein wider

und stiez die jungen alle nider.

Literatur:

**Die Lieder Neidharts.** Hrsg. von Edmund Wießner.  
Fortgef. von Hanns Fischer. 4., verb. Aufl., hrsg. von  
Paul Sappler. Mit einem Melodienanhang von Helmut  
Lomnitzer. Tübingen 1999 (ATB 44).